

本經逢原卷二

清

長洲石頑張

璐路玉父纂述

男

以柔安世

叅訂

日本

大泉長菴前田安宅子仁

再訂

男典子守

芳草部

當歸

甘辛溫無毒。蜀產者力剛可攻。秦產者力柔可補。凡

治本病酒制。有痰薑汁制。白者為粉歸。性劣不入補劑。

本經主欬逆上氣。溫瘧寒熱。洗洗在皮膚中。婦人漏下絕子。

諸惡瘡瘍金瘡。煮汁飲之。

發明 當歸氣味俱厚。可升可降。入手少陰足太陰厥陰血

分。凡血受病及諸病夜甚。必須用之。本經主效逆上氣。溫瘧寒熱洒洒。婦人漏下絕子。皆取辛溫潤血之功。產後惡血上衝。亦必用之。別錄溫中止痛。甄權治下痢腹痛。女人瀝血腰痛。好古治衝脈爲病。逆氣裏急。帶脈爲病。腹痛。腰溶溶若坐水中。其功專於破惡血。養新血。潤腸胃。榮筋骨。澤皮膚。理癰疽。排膿止痛。蓋血壅而不流則痛。當歸甘溫。能和營血。辛溫能散內寒。使氣血各有所歸。入手少陰。心主血也。入足太陰。脾裏血也。入足厥陰。肝藏血也。身能養血。尾能行血。同人参黃耆。則補氣而生血。同牽牛大黃。則行氣而瀉血。同桂附吳萸。則熱。同大黃芒硝。則寒。血虛以人参赤脂爲佐。血熱以生地條芩爲佐。仲景治陽邪陷陰。手足厥寒。脈細欲絕。用當歸四逆湯。於桂枝湯加當歸細辛通草。以通其血脈。卽下痢脈

大氣不歸附。亦用此湯以歸附之。凡血虛發熱者。宜當歸補血湯。方用當歸三錢。黃耆一兩。作三服。心下刺痛者。一味當歸酒煎服。專主血分諸病。海藏言當歸血藥。何本經治欬逆上氣。按當歸辛散。乃血中氣藥。故欬逆上氣。有陰虛陽無所附者。用血藥補陰。則血和而氣降矣。凡衝任督帶病皆不可少。惟泄瀉家痰飲家禁用。

芎藭

綱目名川芎

辛溫無毒。蜀產者味辛而甘爲上。他處產者

氣味辛烈爲下。反藜蘆。葉名縻蕪。

本經主中風入腦頭痛。寒痺筋攣緩急金瘡。婦人血閉無子。發明芎藭辛溫上升入肝經。行衝脈。血中理氣藥也。故本經治中風入腦頭痛等證。取其辛散血分諸邪也。好古言搜肝氣補肝血。潤肝燥補風虛。又治一切風氣血氣。及面上遊

風目疾多淚。上行頭目。下行血海。故四物湯用之者。皆搜肝經之風。治少陽厥陰頭痛。及血虛頭痛之聖藥。助清陽之氣。去溼氣在頭。頭痛必用之藥。血刺已通。而痛不止。乃陰虧氣鬱。藥中加芎藭。氣行血調。其痛立止。靈苑方驗胎法。以生芎藭末艾湯服一錢七。腹中微動者爲胎。千金方治子死腹中。以芎藭末酒調方寸匙。須臾二三服立出。凡骨蒸盜汗。陰虛火炎。欬嗽吐逆。及氣弱之人不可服。其性辛散。令真氣走泄而陰愈虛也。

撫芎

辛溫無毒。產江左撫州。中心有孔者是。

發明

撫芎升散。專於開鬱寬胸。通行經絡。鬱在中焦。則胸

膈痞滿作痛。須撫芎開提其氣以升之。氣升則鬱自降。故撫

芎總解諸鬱。直達三焦。爲通陰陽氣血之使。然久服耗氣。令

入暴亡。

蛇牀 苦辛溫無毒

本經主男子陰痿溼癢。婦人陰中腫痛。除痺氣。利關節。癰瘤

惡瘡。

發明 蛇床辛香性溫。專入右腎命門。少陽三焦氣分。本經

列之上品。不獨助男子壯火。且能散婦人鬱攸。非妙達本經

精義。不能得從治之法也。但腎火易動。陽強精不固者勿服。

藁本 辛苦溫無毒。香而燥者良。臭而潤者勿用。

本經主婦人疝瘕。陰中寒腫痛。腹中急。除風頭痛。長肌膚。悅

顏色。

發明 藁本性升屬陽。爲足太陽寒鬱經中。頭項巔頂痛。及

大寒犯腦。連齒頰痛之專藥。女人陰腫疝瘕。督脈爲病。脊強

而厥亦多用之。霧露之邪。中於上焦。須兼木香。風客於胃泄瀉。脾胃藥中。宜加用之。今人只知藁本爲治巔頂頭腦之藥。而本經治婦人疝瘕。腹中急。陰中寒等證。皆太陽經寒溼爲病。亦屬客邪內犯之候。故用藁本去風除溼。則中外之疾皆瘳。豈特除風頭痛而已哉。云長肌肉悅顏色者。外用作而脂之類是也。但頭痛挾內熱。春夏溫病熱病。頭痛口渴。及產後血虛火炎頭痛。皆不可服。

白芷

卽都梁香

辛苦溫無毒

本經主女人漏下赤白。血閉陰腫。寒熱頭風。侵目淚出。長肌膚潤澤顏色。可作面脂。

發明

白芷辛香升發。行手陽明。性溫氣厚。行足陽明。芳香

上達。入手太陰。爲解利陽明風熱頭痛。及寒熱頭風。侵目淚

出之要藥。其所主之病。不離二經。如寒熱頭風。眉稜骨痛。頭目齒痛。三經之風熱也。漏下赤白。癰疽。頭面皮膚風痺。燥癢。三經之溼熱也。風熱者辛以散之。溼熱者溫以除之。都梁丸治崩漏赤白。深得本經之旨。性善祛風。女人漏下赤白。皆風入胞門所致。辛香入脾。故又能溫散血閉陰腫。及寒熱頭風。侵目淚出。總取辛散利竅之功。其長肌膚潤澤顏色者。則有排膿長肉之力。所以外科用之。痘疹起脹。連皮腫者。於解毒藥內用之。預杜將來發癢之患。今人用治腸癰。有敗膿淋漓不亡。腥穢殊甚。遂致臍腹冷痛。須此排膿。膿盡乃以他藥補之。燒烟辟蟲蛇。爲末新汲水調頻灌。解蛇毒內攻。和膽礬麝香。搽蛇傷潰爛。但性溫而升。味苦而散。故嘔吐因於熱者。漏下赤白。因於火者。勿用。癰疽潰後。亦宜漸減。以其能耗胃氣。

也

白芍藥

酸苦平微寒無毒入補脾藥酒炒入止血藥醋炒

入和營藥及下痢後重血熱癰毒藥並酒洗生用入血虛水

腫腹脹藥桂酒制用反藜蘆

本經主邪氣腹痛除血痺利小便益氣

發明白芍藥酸寒斂津液而護營血收陰氣而瀉邪熱蓋

瀉肝之邪熱所以補脾之陰卽本經主邪氣腹痛益氣之謂

故仲景以爲補營首藥入肝脾血分及陽維寒熱帶脈腹痛

補中下二焦能於土中瀉水爲血痢必用之藥然須兼桂用

之方得斂中寓散之義建中湯之妙用人所不知蓋瀉痢皆

太陰之病建中專主太陰腹痛也其治血痺黃耆桂枝五物

湯中用之非深達本經妙理者不能也又得炙甘草治腹中

急痛。同白朮補脾。同芎藭瀉肝。從人參補血虛。從黃連止瀉痢。同薑棗溫經散溼。在用者各得其宜耳。凡人陽氣虛衰。陰氣散漫。患腹脹滿急。於補中益氣藥中。加白芍藥一味。以收陰。則陽虛不受陰制之脹。得陽藥便消矣。然氣虛內寒者。不可用。古云減芍藥以避中寒。誠不可忽。產後不可用。以其酸寒瀉肝。伐生發之氣也。小便不利者禁用。以膀胱得酸收斂愈秘也。而真武湯中。又用以利小便者。深得本經之旨。蓋真武湯本治少陰精傷。而證見虛寒。非太陽膀胱癰閉之候。以其能益陰滋血。培養津液。小便自行。非通利也。至於桂枝湯中。用以護營血。使邪不得內犯。建中湯中。用以培土藏而治陽邪內陷腹痛。此皆仲景用藥之微妙。端不外本經之義。其除血痺。破堅積。治寒熱疝瘕。止痛利小便。皆指赤者而言。與

白芍無預。因本經未分赤白。故一貫例之。

赤芍藥。酸苦微寒。無毒。酒洗用。

本經除血痺。破堅積。寒熱疝瘕。止痛利小便。

發明 赤芍藥性專下氣。故止痛不減。當歸蘇恭以爲赤者

利小便下氣。白者止痛和血。端不出本經除血痺。破堅積。止

痛利小便之旨。其主寒熱疝瘕者。善行血中之滯也。故有瘀

血留著作痛者。宜之。非若白者酸寒收斂也。其治血痺利小

便之功。赤白皆得應用。要在配合之神。乃著奇勩耳。

牡丹皮。苦辛平。無毒。酒洗去鹼土。曝乾。勿見火。

本經主寒熱中風。癰瘕。驚癇邪氣。除癥堅瘀血。留舍腸胃五

藏。療癰瘡。

發明

牡丹皮入手足少陰厥陰。治血中伏火。故相火勝腎。

無汗骨蒸爲專藥。本經主寒熱中風。癰瘕驚癇等證。以其味辛氣竄。能開發陷伏之邪外散。惟自汗多者勿用。爲能走泄津液也。痘疹初起勿用。爲其性專散血。不無根脚散濶之慮。王安道云。志不足者。足少陰病也。故仲景腎氣丸用之。後人惟知黃蘗治相火。不知丹皮之功更勝也。又癰堅瘀血。留舍腸胃五藏。及陰虛吐血衄血。必用之藥。以能行瘀血。而又能安好血。有破積生新。引血歸經之功。故犀角地黄湯用之。凡婦人血崩。及經行過期不淨。屬虛寒者禁用。又赤者利血。白兼補氣。亦如赤白芍藥之義。諸家言其性寒。安有辛香而寒者乎。

木香 辛苦溫無毒。形如枯骨。味苦色淡黃者良。味鹹色黑勿用。生用理氣。煨熟止瀉。

本草部 甘松香
本經主邪氣辟毒疫。強志。止淋露。

發明 木香氣香味厚。不獨沉而下降。蓋能理胃以下氣滯。乃三焦氣分之藥。兼入肺脾肝三經。能升降諸氣。故上焦氣滯。臍鬱宜之者。金鬱則泄之也。然雖入肺。而肺燥氣上者。良非所宜。其中焦氣滯不運宜之者。脾胃喜芳香也。下焦氣滯後重宜之者。塞者通之也。若治中脘氣滯不運。心腹疼痛。以積榔佐之。使氣下則結痛下散矣。本經辟疫毒邪氣。強志。止淋露。以其辛燥助陽。善開陰經伏匿之邪。大明治心腹一切氣。膀胱冷痛。嘔逆反胃。霍亂瀉痢。健脾消食安胎。甄權治九種心痛。積年冷氣。痲痺癰塊。脹痛壅氣上衝。煩悶羸劣。女人血氣刺痛不可忍。然香燥而偏於陽。肺虛有熱。血枯而燥。及陰火衝上者。勿服。

甘松香 甘溫無毒。

發明 甘松芳香升竄。能開脾鬱。少加脾胃藥中。甚醒脾氣。

主惡氣。卒心腹痛滿。風疳齒齲。得白芷白附子良。脚氣膝腫。

煎湯淋洗効。

山柰 辛溫無毒。

發明 山柰芳香入陽明。暖胃辟瘴癘惡氣。治心腹冷氣痛。

寒溼霍亂。風蟲牙痛。皆芳香正氣之力也。

高良薑 辛大溫無毒。煨熟用。子名紅豆蔻。

發明 良薑辛熱。純陽上升。入足陽明太陰二經。爲客寒所

犯。則逆冷霍亂。腹痛諸病生焉。辛溫暖脾胃而逐寒邪。則胃

中冷逆自除。霍亂腹痛自愈。甄權治腹內久冷氣痛。去風冷

痺弱。大明主轉筋瀉利反胃。解酒毒消食。蘇頌治惡心嘔清。

水皆取暖胃溫中散寒之功也。而寒疝小腹掣痛。須同茴香用之。產後下焦虛寒。瘀血不行。小腹結痛者。加用之。若胃火作嘔。傷暑霍亂。禁用。爲其溫燥也。○紅豆蔻辛溫。主水瀉霍亂。心腹絞痛。止嘔進食。大補命門相火。故正元丹中用之。然能動火。傷目致衄。不宜久服。

草豆蔻 辛溫溫無毒。麪裹煨熟去麪用。

發明 草豆蔻性溫。入脾胃二經。東垣曰。風寒客邪。在胃口之上。當心疼痛者。宜之。丹溪曰。草豆蔻性溫。能散滯氣。若明知口食寒物。胃脘作疼。或淫鬱成病者。用之神効。若熱鬱者。不可用。恐積溫成熱也。然多用能助脾熱。傷肺損目。故陰虛血燥者。忌之。

草果

亦名豆蔻

辛溫溫無毒。去殼生用。

發明 草果與草豆蔻總是一類。其草果治病取其辛熱浮散。能入太陰陽明。除寒燥溼。開鬱化食。利膈上痰。解麪溼魚肉諸毒。與知母同用。治瘴癘寒熱。取其一陰一陽。無偏勝之害。蓋草果治太陰獨勝之寒。知母治陽明獨勝之火也。然瘴亦有不由於嵐瘴氣。而實邪不盛者。忌服。凡溼熱瘀滯。傷暑暴注。洩赤口乾者。禁用。

白豆蔻

俗名豆蔻

辛溫無毒。忌見火。去淨隔膜。不爾令入膈滿。

凡草果草豆蔻縮砂皆然。不獨白豆蔻也。

發明 白豆蔻辛香上升。入脾肺二經。散肺中滯氣。治脾虛癉疾。嘔吐寒熱。能消能磨。流行三焦。營衛一轉。諸證自平。古方治胃冷積氣。嘔逆反胃。消穀下氣。寬膈進食。解酒毒。皆相宜也。若火升作嘔。蘊熱作痛者。勿服。

縮砂密

俗名砂仁

辛溫瀉無毒

發明

縮砂屬土。醒脾調胃。爲脾胃肺腎大小腸胸膈七經

之氣藥。能引諸藥歸宿丹田。治脾虛泄瀉。宿食不消。瀉痢白沫。腹中虛痛。寒飲脹痞。噎膈嘔吐。和中行氣。止痛安胎。用之悉效。同熟地茯苓。納氣歸腎。同檀香豆蔻。下氣安肺。得陳皮白朮。和氣益脾。惟新產婦忌之。恐氣驟行動血也。今人治血痢亦多用之。若積欲盡時。良非所宜。又血虛火炎。欬嗽禁用。妊婦氣滯者宜服。若氣虛者多服。反耗其氣。多致難產。南人性喜條暢。食品每多用之。北人性喜潛藏。藥中亦罕用者。

益智子

辛溫無毒。去殼鹽水炒用。

發明

益智行陽退陰。三焦命門氣弱者宜之。脾主智。此物

能益脾胃。理元氣。補腎虛滑精。胃虛多唾。女人崩漏。治心氣

不足夢泄。夜多小便。及冷氣腹痛。於土中益火也。集驗方縮泉丸。治脬氣不足。方用益智子鹽炒去鹽。與烏藥等分爲末。酒煮山藥粉爲糊。丸如梧子大。空心鹽湯下七十九。丹方治夜多小便。取二十四枚。入鹽同煎。服之有驗。按益智功專補火。如血燥有火。溼熱暴注。及因熱而遺濁。色黃乾結者。不可誤用也。

萆薢 辛大溫無毒。醋浸刮去皮子。免傷肺上氣。

發明 萆薢辛熱浮散。爲頭疼鼻淵要藥。取其能入陽明經。

散浮熱也。性能溫中下氣。治霍亂水瀉。心腹滿者宜之。然辛

熱耗散。能動脾胃之火。多用令人喘欬目昏。腸虛下重。以其

走泄真氣也。

薊葉

子名
薊醬

辛溫無毒